



Waray madig-on nga kuta an kaaway ha nasulong nga gerra han katawhan



Makuri nga target militar an detatsment han 52nd IB ha Brgy. Cagpili, Oras, Este Samar. Kun tan-awon tikang ha apiki nga salog, maupay an pagkapusisyon hini ha usa nga bulod nga 50 metros an kahitas-on ngan bangkilid an mga tagliligid. Natatan-aw ngan nauungbawan hini an palibot ngan sigurado nga maaalerto an nagdedepensa ha hin-o man nga maatake. Napapalibutan ini han doble nga kudal nga may alambre. Gin-andaman liwat hin maupay an internal nga depensa han detatsment. May duha nga klaster hin kabalayan nga nakada ha magpaluyo nga durho nga relatibo nga mas hitaas, nga ginsusumpay hin serye hin mga bablay ha butnga nga parte han detatsment. May mga *running foxhole* ha ilarum han kaudgan han mga bablay nga amo an nagdudurudugtong hini para ha pleksible nga pagdepensa. Naatubang an pinakamakusog nga depensa han kaaway ha usa pa nga bulod ha may talikuran nga gin-aantum nira nga pagtitikangan hin anuman nga atake. Labot ha magbakod nga armas ngan treyning, nagpapahiara utro an mga sundalo ngan CAFGU ha ira depensa. Ha kamatuoran, naglansar pala ini hira hin *drill* usa kaadlaw antes han reyd han BHB. Sugad-sugad an detatsment hin diri-mapupukan nga bantayan ha prontera han reaksyunaryo nga estado.

Kundi bumagsak gihapon ini ha atake han BHB hadton Hunyo 26. Maranggat ini nga kadaugan han ginerilya nga pakiggerra han BHB. Nagin yawe ha kadaugan han taktikal nga opensiba an haluag nga suporta han masa nga parag-uma, ngan an determinasyon nga magdaug ngan maupay ha pagplano, pangandam ngan pagpatuman han BHB.

Pagbuhos han suporta
han masa ngan yunit milisya

Desisibo an papel han masa nga parag-uma agud maipatuman han BHB an taktikal

nga opensiba. Nagmobilisa para hini nga kadaugan an mga kaapi han mga organisasyon masa ha Norte ngan Este han Samar. Ginseguro nira an ayad nga daloy han pagkaon, higamit ngan iba pa nga suplay para ha dako nga ihap han mga Pula nga mangaraway tikang ha iba-iba nga yunit gerilya nga nagkatitirok para ha taktikal nga opensiba. Tungod hini, waray kabuksas an BHB luyo han kadako han ihap han nakadisponer para ha aksyon militar. An masa nga parag-uma liwat an nagserbi nga mga mata ngan talinga han Pula nga Hukbo ha

... *tikang ha paypay 1*

karukayaknon han seguridad, samtang nagpabilin nga buta ngan bungol an pasista nga militar ha gios han mga Pula nga mangaraway.

Direkta nga pumartisipar an mga kaapi han mga yunit milisya ha taktikal nga opensiba tikang ha pangangandam, pagduso ngan pag-atras. May 97 nga kaapi han yunit milisya an aktibo nga nakatutok. Hira an nagdul-ong han pagkaon ha mga kasama tubtob ha atrasan kahuman han away. Hira liwat an nagpas-an han mga eksplosibo ngan iba pa nga ordnans, an nag-ataman ngan nagdara han mga samaran nga kasama kahuman han away. Usa ha ira an bumulig ha Pula nga mangaraway ha paggamit han masinggan, samtang may 10 nga sumuporta ha tim han mga medikal. An iba naman an nagpara han mga tiunob han BHB ha dalan, nagsiguro han suplay ngan seguridad ha mga ginpahuwayan antes ngan kahuman han away, ngan nag-andam ha pagdara ha mga posible nga kaswalti han BHB ha away.

Hugot nga pagkatin ha prinsipyo han ginerilya nga pakiggerra

Gumamit an BHB hin pwersa nga labaw nga mas superyor ha kaaway. Tungod hini, nagin masayon an pagdiskarte ngan paghaum-haum ha plano. Nagpabilin an hitaas nga determinasyon nga magdaug han mga Pula nga mangaraway luyo han mga problema ha koordinasyon ngan iba pa nga diri gin-aantum nga mga problema.


Umagi ha makurimot nga proseso an pagplano ha taktikal nga opensiba ngan nagpabilin nga pleksible ha mga pagbaru-bago han sitwasyon. Hadto pa nga naglabay nga Pebrero gindesisyunan an usa nga aksyon militar ha Norte o Este, depende ha pagtirutimbang. Han sumunod nga bulan, gintukod an pukot-paniktik ha duha nga probinsya. Ginpirmi na an target ha Este pag-abot han Mayo, ngan han Hunyo 20, nagmiting an taktikal nga kumand ngan naplantsa an ikatulo ngan pinal nga plano ha asult. Han Hunyo 22 an talaan han orihinal nga plano kundi gindus-og ini ha Hunyo 26 tungod ha mga teknikal nga problema.

Nagin maupay an proseso han pagplano ngan pagsataktika tubtob ha aktwal nga kondukta han away. Sadang nga naadman ngan naseguro an ngatanan nga aspeto tikang ha pangandam han suplay, pangandam ha mga Pula nga mangaraway (pampulitika nga mobilisasyon ngan *dry run* basar ha plano) ngan an pangandam ha mga posible mahitabo. Iksakto an taktika nga gin-gamit ha pag-awtplank ngan pag-ensirkulo ha kaaway.

Mahinungdanon na liwat an nagin kontribusyon han sobra 20 nga kababayin-an nga Pula nga mangaraway. May pira ha ira nga igindisponer ha *base of fire-1*, samtang nagserbi komo mga medik an iba pa.

Marurumok an anuman nga kuta han kaaway

Ha taktikal nga pagtan-aw ha presente, maluya pa an kabug-osan nga kusog han BHB kun itanding ha AFP. Kundi ha estratehiko nga pagtan-aw, ginsusulong an gerra han katawhan ha panmaihaan agud papitad-pitad nga paluyahon an kaaway samtang ginpapakusog naman an BHB. Ginpamatud-an han kadaugan ha Cagpili nga waray madig-on nga kuta an kaaway kontra ha nasulong nga gerra han katawhan. Ha pagkaurusa han BHB ngan han katawhan ha haluagan ngan sik-on nga ginerilya nga pakiggerra, burublig nga marurumok hin pausa-usa an anuman nga kuta han kaaway tubtob nga mapukan an bug-os nga pasista nga makinarya han estado. ▲




Nag-aaningal an kadaugan ha Cagpili han Pula nga Hukbo!

Sulhog la an lamrag ha kaagahon han Hunyo 26 samtang sikreto nga nagmamaniobra an mayor nga pwersa ha asult han BHB tikadto ha target nga detatsment han 52nd IB ha Brgy. Cagpili, Oras, Este Samar. Nakatungtong an detatsment ha bawbaw han bulod nga 50 metros an kahitas-on ngan naatubang ha salog. Diri gin-aantum han pasista nga kaaway nga magtitikang ha direksyon han salog an anuman nga atake han BHB. Nakatadong an ira pagsubaybay ngan depensa nga may platun an kadakuon nga mga regular nga sundalo ngan CAFGU ha usa pa nga bulod ha talikuran han ira ginpoposisyunan. Kundi ginsingabot han BHB an sugad hini nga panhuna-huna han kaaway tungod kay nakapusisyon an nangunguna nga *base of fire* (base of fire-1) didto ha usa nga bulod komo panringgal ngan pampayong ha pwersa nga maasult ngan ha ikaduha nga *base of fire* (base of fire-2). Subay ha plano, aagawon anay an maluya nga parte han detatsment sa usa nga durho ngan hihimuon ini nga ikaduha nga *base of fire*, agud papitad-pitad nga makuha an mga pusisyon han kaaway ha butnga nga parte ngan ha kaluyo nga durho nga may pinakamabakod nga depensa an kaaway.

Kundi may taktikal nga problema samtang tikaapiki an oras han pag-atake. Diri makontak ha radyo han pwersa nga pan-asult an yunit ha *base of fire-1*. Utod an komunikasyon giutan han pankabug-osan nga kumand ngan han nakadto ha *base of fire-1*.

☛ padayon ha paypay 4



... *tikang ha paypay 3*

Madagmit nga naghisingot an pankabug-osan nga kumand. Naghuhulat na an mayor nga pwersa nga pan-asult ngan an duha nga yunit nga gintalaan ha sarop. Kundi nakasarig ha *base of fire-1* nga diri na makontak an pagduso han opensiba. Tipaunano na kun sugad maiduduso an orihinal nga plano?

Basar ha pagtirutimbang, nagdesisyon an pankabug-osan nga kumand: Ibahon an orihinal nga plano ngan ipatuman an atake basar ha taktika nga payr ngan manyuber. Karuyag sidngon, maduso na an mayor nga pwersa nga pan-asult ngan diri na huhulaton pa an *base of fire-1*. Bisan pa man kun may pagbabag-o, may kumpyansa pa gihapon an BHB ha kadaugan tungod han elemento han sorpresa, superyor nga ihap ngan maupay nga pagtaktika kontra ha kaaway. Tungod han pagbabag-o ngan tungod kay waray komunikasyon ha *base of fire-1*, medyo hirayo pa an mga Pula nga mangaraway ha bulod nga ginpoposisyunan han detatsment. Ha mga sinkronisado nga relo, madagmit nga lumabay an mga minuto, nga nagin mga segundo nga tumimbre ha alas 4:30 han aga.

Tigda ginpuknit an kamingawan han magkusog nga bubto han mga masanggan ngan magkadirudilain nga armas han *base of fire-1* nga nagpunting ha pusisyon han kaaway! Gintuman han mga kasama an talaan nga oras ha pagtikang han atake bisan pa man kun nautod an komunikasyon!

Madagmit nga ginmandar han kumand an pagbalik ha orihinal nga plano. Tikang pa ha hirayo dumuso an mga Pula nga mangaraway ha *base of fire-2* ngan an pwersa nga pan-asult ha ira talaan nga mga posisyon. Nagbase an kumand ha usa nga kapilya nga apiki ha bulod agud idiriher an opensiba. Sugad hin mga bola hin kalayo an nagkakalupad nga *flare* han mga pasista nga sundalo agud masayod an paspas nga namagkakaduok nga mga Pula nga mangaraway. Haros ginkinahanglan pa nga kamangon han mga Pula nga mangaraway an malagay ngan bangkilid nga bulod nga ginkakamutangan han detatsment. Dugang nga nakurian an mga kasama tungod kay madig-on an doble nga alad nga kahoy nga gintauran hin mga alambre. Ha dayuday, gin-alsa nala ini ngan namagkamang an mga kasama ha ilarum, samtang an kadam-an han mga kasama in umagi ha hagdan ngan tarangkahan han detatsment.

Nagtitikalamrag na an bag-o nga adlaw ha bawbaw han waray-undang nga pupsilay, bubtuhay ngan pagkanap han aso ngan hurak han pulbura. Naagaw han mga Pula nga mangaraway an target ha usa nga durho han pusisyon han kaaway. Ha mapintas nga agway para hini nga importante

nga posisyon, namatay hi Kasamang Noli. Pinusisyon dayon an mga kasama agud makonsentrahan hin pagpabuto an butnga nga pusisyon han kaaway nga gin-aatake na han pwersa ha asult.

Nabisto han mga Pula nga mangaraway nga urog nga mas maupay an depensa han detatsment tanding ha gin-adman ngan ginlatag ha oryentasyon antes han away. Mas damo an mga balay nga inabot hin 19, ngan may sistema hin mga *running foxhole* nga nagsusumpay han mga balay ngadto ha prinsipal nga erya han depensa han kaaway nga nakaatubang ha kaluyo nga bulod. Bisan pa man, usa-usa nga iginpakig-away an pagkontrol han kada balay, tubtob nga naagaw pati an butnga nga pusisyon han kaaway ngan naensirkuluhan an nasasalin nga mga sundalo ngan CAFGU ha katapusan nga durho han pusisyon han detatsment. Lumahos pa han alas 6:00 han aga an agway dinhi, ngan dinhi namartir hi Kasamang Jess samtang gin-aaghat niya an mga Pula nga mangaraway komo kumander han asult. Sumurender an nasalin nga sundalo nga samaran ngan nakontrol an detatsment kahuman hin sumobra-kumulang usa kaoras ngan 45 minuto.

Napatay ha agway an lima nga regular nga sundalo ngan 10 nga CAFGU. Nasamaran naman an duha nga sundalo (an usa ha ira in nakaiskapo), ngan usa nga babaye nga sibilyan nga asawa han sundalo nga gintuyangan umukoy ha kampo, nga namatay gihapon tungod han grabe nga samad. Nakumpiska an 25 nga armas: usa nga M203, pito nga M16, lima nga M14, siyam nga Garand, duha nga karbin, ngan usa nga .45 kal. nga pistola. Nakuha liwat an 2,225 nga bala, mga higamit pankomunikasyon, mga habersak ngan uniporme ngan iba pa nga higamit militar ngan pan-opisina. Gintambal han BHB an mga nasamaran ngan igindul-ong ha apiki nga baryo an tulo kabulan nga anak han sundalo agud matimangno han taghimaryo. Ginsunog han mga Pula nga mangaraway an detatsment antes hira sumakay hin tulo nga poso kanter ha pag-atras. Waray na hira kasundi han kaaway, ngani waray igsarabot an kaaway kun tipakain nga direksyon an pag-atras han mga kasama.

Samtang natutupok han kalayo an narumok nga kampo han kaaway, talwas nga ginsulsog han mga Pula nga mangaraway an salog. Umagi an mga poso kanter ha pira nga baryo, kun diin nagpurunpon ha ligid han salog an masa nga parag-uma agud dayigon an mga Pula nga mangaraway. Kahuman han aningal han mga punglo, nag-aningal naman ha kahilab-an han salog an saludo han mga parag-uma: “Mabuhay an BHB! Mabuhay, daug an away!” ▲